

IRAGARKIA

195. ALDIZKARIA - 2021eko abuztuaren 19a - BEREZIA

1. NAFARROAKO FORU KOMUNITATEA

1.1. XEDAPEN OROKORRAK

1.1.3. Foru Aginduak

30/2021 FORU AGINDUA, abuztuaren 17koa, Osasuneko kontseilariak emana, zeinaren bidez luzatzen baita Osasuneko kontseilariaren ekainaren 29ko 22/2021 Foru Aginduaren lehen ataleko 40. puntuaren indarraldia. Foru agindu horren bidez, berariazko prebentzio neurri apartekoak hartu ziren Nafarroako Foru Komunitaterako, COVID-19ak eragindako egoera epidemiologikoak izandako bilakaeraren ondorioz.

Osasuneko kontseilariaren ekainaren 29ko 22/2021 Foru Aginduaren bidez, berariazko prebentzio neurri apartekoak hartu ziren Nafarroako Foru Komunitaterako, COVID-19ak eragindako egoera epidemiologikoak izandako bilakaeraren ondorioz. Foru agindu hori Osasuneko kontseilariaren uztailaren 19ko 24/2021 Foru Aginduaren bidez aldatu zen. Foru agindu horretan, mantendu egin zen taberna bereziaren, ikuskizunetarako kafetegiaren, diskotekaren eta dantzalekuaren lizentzia duten establezimenduak irekita egoteko ordu muga, 1:00ean itxi behar baitute. Horrez gain, mugatu –eta ez galarazi– egin zen gaueko zirkulazioa, ordu horretatik goizeko 06:00ak arte, jarduketak koordinatzeko Osasun Ministerioaren ekainaren 2ko dokumentuaren arabera arrisku oso handian zeuden udalerrietan (hau da, 14 eguneko intzidentzia-tasa 250 kasutik gorakoa bazen 100.000 biztanleko, eta 125 kasutik gorakoa 7 egunekoa). Orobat, jende pilaketak saihesteko neurri berriak ezarri ziren, batez ere prebentzio neurriak lasaitzen diren ekitaldietan aplikatzekoak, hala nola kalejiretan (Nafarroako udalerrri batzuetan arrisku egoerak eta kutsatzeak eragin baitituzte), herri bazkarietan eta aire zabaleko zezen-ikuskizunetan (zezen-plazetatik kanpo egiten direnetan). Azkenik, neurri sinergiko horien multzoa ixteko, eremu publikoetan biltzen ahal zen pertsona kopurua ere mugatu zen: 10 lagun gehienez. Salbuetsita gelditu ziren, ohi bezala, hamar kideetik gorako bizikidetzak-unitateak eta baimena zuten taldeak, aldatzen zen foru aginduan jasotako mugekin bat etorriz.

Nafarroako Justizia Auzitegi Nagusiko Administrazioarekiko Auzien Salaren uztailaren 20ko Autoaren bidez, 24/2021 Foru Aginduan hartu ziren neurriak baimendu ziren, 8. puntukoak izan ezik (“Pertsonak gauez zirkulatzeko duten askatasuna mugatzea Nafarroako Foru Komunitatean”). Izan ere, ez ziren identifikatu neurri horrek ukituko zituen udalerrriak, eta horrek

galarazi zuen Nafarroako Justizia Auzitegi Nagusiko Administrazioarekiko Auzien Salak baimentzea.

Gero, Osasuneko kontseilariaren uztailaren 22ko 25/2021 Foru Aginduaren bidez, berriz aldatu zen Osasuneko kontseilariaren 22/2021 Foru Agindua, eta pertsonen gaueko zirkulazioa mugatu egin zen egun jakin batzuetarako. Beharrezkotzat jo zen pertsonen gaueko zirkulazioa mugatzea (baina ez galaraztea) asteburuetan, jaiegunetan eta herriko jaiak eginen ziratekeen egunetan, udalerrri jakin batzuetan, hots, 14 eta 7 egunean neurtutako intzidentzia metatuaren balioak muturreko arrisku egoeran zituzten udalerrietan (arrisku oso handia, jarduketak koordinatzeko Osasun Ministerioaren dokumentuan).

Foru agindu hori osorik baimendu zuen Nafarroako Justizia Auzitegi Nagusiko Administrazioarekiko Auzien Salak, uztailaren 23ko 108/2021 Autoaren bidez.

Osasuneko kontseilariaren uztailaren 27ko 26/2021 Foru Aginduaren bidez, luzatu egin zen ekainaren 29ko 22/2021 Foru Agindua, epaileek baimendutako aldaketa guztiak barne, eta hein batean aldatu ziren bertan bildutako neurri batzuk. Bestalde, foru aginduaren 40. puntuak aldatu zen, gaueko zirkulazioa murrizteko neurriak aplikatzeko irizpideak betetzen zituzten udalerrien zerrenda gehituz. Ezarri ere egin zen udalerrien zerrenda hori astero eguneratu eta argitaratuko zela, bai Nafarroako Aldizkari Ofizialean, bai Gobernu Irekiaren Atarian, eta epaileek astero berretsi beharko zutela; izan ere, intzidentzia metatuak denbora laburrean aldatzen dira datu epidemiologikoen arabera. 2021eko abuztuaren 5era arte indarrean egotea erabaki zen. Foru agindu hori osorik baimendu zuen Nafarroako Justizia Auzitegi Nagusiko Administrazioarekiko Auzien Salak, uztailaren 29ko 111/2021 Autoaren bidez.

Azkenik, abuztuaren 3ko 27/2021 Foru Aginduaren bidez, abuztuaren 12ra arte luzatu zen (egun hori barne) ekainaren 29ko 22/2021 Foru Aginduaren lehen ataleko 40. puntuaren indarraldia. Horrez gain, aldatu ere egin zen gaueko zirkulazioa mugatzeko neurria (egun eta ordu jakin batzuetan) aplikatzekoa zaien udalerrien zerrenda. Foru agindu hori judizialki baimendu zuen Nafarroako Justizia Auzitegi Nagusiko Administrazioarekiko Auzien Salak abuztuaren 4ko 113/2021 Autoaren bidez.

Osasuneko kontseilariaren abuztuaren 10eko 29/2021 Foru Aginduaren bidez, berriz luzatu zen ekainaren 29ko 22/2021 Foru Aginduaren lehen ataleko 40. puntuaren indarraldia, abuztuaren 19ra arte, egun hori barne, eta aldatu egin zen udalerrien zerrenda. Era berean, aldaketa puntual batzuk egin ziren kirolaren arloan, kirol instalazioen erabilerari dagokionez, eta zezen-ikusketen arloan. Foru agindu hori judizialki baimendu zuen Nafarroako Justizia Auzitegi Nagusiko Administrazioarekiko Auzien Salak, 2021eko abuztuaren 12ko 114/2021 Autoaren bidez.

Nafarroako Osasun Publikoaren eta Lan Osasunaren Institutuaren 2021eko abuztuaren 16ko txostenaren arabera, 7 egunean metatutako intzidentzia-tasa behera doa poliki-poliki. Abuztuaren 15ean, 213,8 kasu berrikoa da 100.000 biztanleko, eta horrek esan nahi du oraindik ere arrisku oso handian edo muturreko arriskuan gaudela (125 kasu baino gehiago 100.000 biztanleko). Ratioa 2,28koa da. 12 urte bitartekoen eta 12-29 urtekoen intzidentzia-tasak Estatuko altuenen artean daude oraindik ere. Intentsitate ertaineko zirkulazio epidemikoko egoeran jarraitzen dugu, eta intzidentziek, poliki-poliki, beherantz jarraitzen dute. Azken astean,

200 kasu/egun izan ditugu batez beste.

14 eguneko eta 7 eguneko intzidentzia-tasa metatu orokorrean eta 64 urtetik gorakoentzat datuak erreparatuta, Nafarroak arrisku oso handian edo muturreko arriskuan jarraitzen du, baita azken 7 egunetan infekzio aktibo positiboko identifikazio proben ehunekoari erreparatuta ere.

Ospitaleetako okupazioari dagokionez, Nafarroa arrisku baxuan/ertainean dago paziente akutuak kontuan hartuta, eta arrisku handian ZIUko datuak erreparatuz gero, okupazioa %15etik gorakoa baita (%22,21ekoa). Hortaz, alerta mailaren arabera sailkapena aplikatuta, Nafarroa 3. alerta mailan dago, hau da, alerta maila altuan.

Txertaketa aurrera doa, eta biztanleria osoaren %73,2k dosi bat dauka jadanik, eta %65,1ek pautua osoa. Ahalgaitzak egiten ari da 60-69 urte bitartekoentzat txertaketa osatzeko: dagoeneko, %94,9k dosi bat jarrita dauka, eta %92,6k pautua osoa. Adin-tarte horrek arrisku handia du koronabirusak eragindako infekzioa dela eta konplikazioak izateko. Aurrera doa, orobat, 30-39 urtekoentzat eta 20-29 urtekoentzat txertaketa (hurrenez hurren, %65,7k eta %42k pautua osoa hartu dute), eta 12-15 urtekoentzat ia %50ek dosi bat hartu du.

Hartu diren hiru neurri garrantzitsuenei esker (hau da, ostalaritzako jarduerak eta bestelako jarduerak murriztea, 01:00ean itxita; gaueko ordutegia 01:00etik 06:00etara mugatzea asteburuetan, jaiegun orokorretan eta udalerririk bakoitzeko jaiegunetan; eta gehienek ere 10 lagun elkartu ahal izatea eremu publikoan), modu sinergikoan eragiten baitute, eta txertaketa osoarekin batera, zeinak erakutsi baitu eraginkortasun eta inpaktu handia duela kasu larrien prebentzioan, oreka bat lortzen ari da, intzidentzia poliki baina progresiboki jaistea eragiten ari dena.

Beharrezkoa da 14 eguneko eta 7 eguneko intzidentzia metatuak jaistea, hurrenez hurren 250 eta 125 kasutik beherakoak izan daitezkeen 100.000 biztanleko, eta, horrela, arrisku oso handia edo muturreko arriskua atzean uzteko. Gainera, infekzio aktiboko identifikazio proba positiboentzat ehunekoak %10etik beherakoa izatea lortu behar da, arrisku handia atzean uzteko. ZIUetako okupazioari dagokionez, oso garrantzitsua da ZIUko dauden pazienteentzat kopurua 20tik beherakoa izatea.

Horiek horrela, oraindik ere beharrezkotzat jotzen da gaur egungo neurri murriztaile horiei guztiei eustea, barnean dela gauez zirkulatzeko ordutegia mugatzea 01:00etik 06:00etara, intzidentziak gaur egungo beheranzko joerari jarrai diezaion, bosgarren uhina hasi aurreko oinarritzko egoerara iritsi arte. Neurri horietariko edozein kentzeak, abuztua bezalako hilabete batean, berekin ekar dezake oreka hori eta beheranzko joera haustea; izan ere, mugikortasun eta interakzio sozial handiko sasoia dugu hilabete hau, hilabete honetan izaten baitira jaiegun eta oporraldi gehienak. Bestalde, komenigarria da ahalik eta baldintzarik onenetan iristea heldu den ikasturtearen hasierara.

Nafarroako Ospitalegunetako txostenaren arabera, ZIUetako presioa gora doa infektatutako pertsonen adin-profila aldatu delako eta, horrez gainera, bosgarren olatu honetan gehiago direlako, behin ospitaleraturik, ZIUko sartu beharra duten pazienteak, aurreko olatuetako datuekin alderatuta. Ugaltze hori laugarren olatuan ere sumatu zen, alfa aldaeraren eskutik, eta delta aldaerarekin ere gertatu da, txertoak ematen duen babesa gorabehera.

ZIUko unitateen okupazioak gora segitzen du (abuztuaren 16an, 26 ohe zeuden okupatuak), eta maila altuan jarraituko du zenbait astez, kontuan harturik unitate horietako pazienteen batez besteko egonaldiak. Oso garrantzitsua da gogoraraztea ezen, 30 ohe betez gero, arrisku oso handira igaroko ginatekeela. Gainera, ZIUetan, COVID-19az besteko laguntza behar duten ohiko pazienteak artatzen dira, eta mota bateko eta besteko istripuak izaten dituztenak, horiek ere ugaltzen baitira mugikortasuna eta kirol eta natur jarduerak ugaltzearekin batera. ZIUetan ohe gehiago jarri behar izanez gero, ospitaleetan COVID-19ari loturik ez dauden laguntza-jarduerak desprogramatu beharko dira, eta atseden beharra daukaten osasungintzako langileen oporrak bertan behera utzi. Hori horrela, Osasuneko zuzendari nagusiaren txostenean adierazi bezala, gaur egun kezagarriena da ZIUetan dagoen presio asistentziala. Bosgarren olatuan bete-bete gaudela presio horren balorazio zehatza egitea zaila bada ere, aurreratu daiteke, intzidentziarekin alderatuta, espero baino handiagoa izaten ari dela, batez ere txertoen estaldura kontuan harturik.

Hurrengo asteak mugikortasun handiko eta arrisku handiko aldiak dira oraindik, jaiegunei eta bestelako ospakizunei lotuak. Testuinguru horretan, Nafarroako Ospitalegunearen txostenean adierazten da ezen, kasuen jaitziera nabarmen bat gertatu arte eta osasun sistema jasaten ari den presioa lasaitu arte, beharrezkoa dela prebentzio komunitariorako neurriak mantentzea, batez ere arrisku handieneko kolektibo, testuinguru eta inguruneetan. Denbora irabazi behar da txertaketa-prozesua biztanleria babesteko moduko atalase batera irits dadin. Une honetan, delta aldaeraren kutsagarritasuna ikusirik, atalase hori igotzea aztertzen ari dira.

Aurreko guztia ikusirik, beharrezkotzat jotzen da 2021eko abuztuaren 26ra arte luzatzea (egun hori barne) gaueko zirkulazioa murrizten duen neurria. Neurri hori aplikatuko da ekainaren 29ko 22/2021 Foru Aginduaren (geroago aldatu zenaren) 40. puntuko irizpideak betetzen dituzten udalerrietan. Izan ere, argi geratu da neurri egokia dela, eraginkorra delako. Neurri hori hartu zenetik, beherantz egin dute kutsatzeek eta ospitaleratzeek, nahiz eta ZIUetan goranzko joera dagoen, Nafarroako Ospitalegunearen txostenean adierazi bezala, eta horrek eragin handia du ospitaleetan.

Txosten teknikoak ikusirik, oraindik ere beharrezkotzat jotzen da gaueko ordutegiaren muga mantentzea, 01:00etik 06:00etara, ezarritako irizpideak betetzen dituzten udalerrietan, intzidentzia orokorrak gaur egungo beheranzko joerari jarrai diezaion, bosgarren olatua hasi aurreko oinarrizko egoerara iritsi arte. Neurrietariko edozein kentzeak, abuztua bezalako hilabete batean, berekin ekar dezake oreka hori eta hasitako beheranzko joera haustea; izan ere, mugikortasun eta interakzio sozial handiko sasoiari gaude, hilabete honetan izaten baitira jaiegun eta oporraldi gehienak.

Gainera, neurri hori mantendu beharra dago, batez ere, garai honetan mugikortasun eta interakzio sozial handia dagoelako, eta Nafarroan, oro har, intzidentzia-tasa altuak daudelako, eta horrek ondorioak dituelako ospitaleetan.

Egiaztatu denez, kutsatzeak eta agerraldi superkutsatzaileak eragin ditzakeen interakzio sozialari eusteko neurririk eraginkorrena izan da kasu jakin batzuetan gaueko zirkulazioa murriztea, eta, horrekin batera, ostalaritzako ordutegiak mugatzea eta eremu publikoan elkar daitezkeen taldeak murriztea.

Orain luzatzen den erabakia neurritzkoa da; izan ere, modu selektiboan aplikatzen da, hots, Osasuneko kontseilariaren ekainaren 29ko 22/2021 Foru Aginduaren 40. puntuko baldintzak betetzen dituzten udalerrietan baizik ez da aplikatzen, egun eta ordutegi jakin batzuetan, behin egiaztaturik lehenago hartutako neurriak ez direla aski agerraldiei eusteko, eta zirkulazioa murrizteko neurria eraginkorra izan dela aurreko beste olatu batzuetan. Foru aginduaren eranskinean jasotako udalerrri horiek arrisku oso handiko intzidentzia metatuak dituzte, behera egin beharko luketenak muturreko arriskutik aterako badira, eta, gainera, departamentuak emandako datuen arabera, oraindik ez dute behar adinako txertaketa estaldurarik, zeina, orain, delta aldaerarekin, %80 eta %90 bitartekoa baita. Gainera, heldu den astean, herri horietatik hemezortzitan herriko "ez-festen" garaia da, eta hori arrisku-faktore gehigarri bat da kutsatzeak ugaltzeko, batez ere gazteen artean, kolektibo hori baita une honetan txertaketaren estaldura txikiena duena (20-29 urtekoen taldean, %42k hartua du pauta osoa, eta 12-19 urtekoen taldean, %9,3k).

Neurria indarrean mantentzearekin, gainera, jarduera ekonomikoaren interesak eta pandemiaren kontrola uztartu nahi dira; izan ere, neurri honek jarduera ekonomikoa egunez irekita egotea ahalbidetzen du, gau berandura arte, eta horrela saihesten da gizartean eta ekonomian eragin handiagoa izanen luketen beste neurri murriztaileago batzuk hartzea.

Neurri horiek Osasun Publikoaren arloko Neurri Bereziei buruzko apirilaren 14ko 3/1986 Lege Organikoaren 2. eta 3. artikuluetan xedatutakoa dute arau-oinarri, non xedatzen baita ezen, osasun publikoa babesteko eta haren galera edo narriadura eragozteko, administrazio publikoetako osasun arloko agintariek, beren eskumenen esparruan, transmisio arriskuko kasuetan beharrezkotzat jotzen diren neurriak hartu ahal izanen dituztela, urgentziatzko edo premiazko osasun arrazoiak hala eskatzen dutenean.

Bestalde, hala adierazten baitu bere 26.1 artikuluan Osasunari buruzko apirilaren 25eko 14/1986 Lege Orokorrak, osasunerako berehalako arrisku ohiz kanpoko bat baldin badago, edo zentzuz jokatuta susmatzen bada badagoela, osasun arloko agintariek egokituz jotzen dituzten prebentzio neurriak hartuko dituzte, hala nola produktuak konfiskatu edo immobilizatzea, jarduerak bertan behera uztea, enpresak edo haien instalazioak ixtea, bitarteko materialen eta giza baliabideen interbentzioa, bai eta osasunaren ikuspuntutik justifikatuz jotzen diren beste guztiak ere.

Osasun Publikoari buruzko urriaren 4ko 33/2011 Lege Orokorrak 54.1 artikuluan ezartzen duenez, eta galarazi gabe Osasun Publikoaren arloko Neurri Bereziei buruzko apirilaren 14ko 3/1986 Lege Organikoan aurreikusitako neurriak, salbuespenez eta aparteko larritasunak edo presak agindutako egoeretan, Estatuko Administrazio Orokorrak, autonomia erkidegoetakoek eta Ceuta eta Melilla hirietakoek beharrezkoak diren neurri guztiak hartzen ahalko dituzte, zeinek bere eskumenen esparruan, legea betetzen dela ziurtatzeko. Horrez gain, 2. artikuluan ezartzen du, zehazki, agintaritzak eskudunak neurri batzuk hartzen ahalko dituela ebazpen arrazoituaren bidez, galarazi gabe Osasunari buruzko apirilaren 25eko 14/1986 Lege Orokorrean aurreikusitakoa; neurri horien artean aipatzen du bitarteko materialen edo giza baliabideen interbentzioa (b apartatua) eta jarduerak bertan behera uztea (d apartatua).

Beraz, bidezkoa da 22/2021 Foru Aginduaren 40. puntuaren indarraldia luzatzea eta,

horrenbestez, jendearen zirkulazio askatasuna mugatzea gauez eta foru agindu honen eranskinean agertzen diren udalerrietan, goian adierazi denaren ildotik.

Administrazioarekiko Auzien Jurisdikzioa arautzen duen uztailaren 13ko 29/1998 Legearen 10. artikulua, Justizia Administrazioaren esparruan COVID-19ari aurre egiteko neurri prozesal eta antolaketakoei buruzko irailaren 18ko 3/2020 Legeak aldatutakoak, xedatzen du Justizia Auzitegi Nagusietako administrazioarekiko auzien salak arduratuko direla baimen edo berrespen judiziala emateaz Estatukoak ez diren osasun agintaritzek osasun arloko legeriarekin bat hartzen dituzten neurriei, agintaritz horiek osasun publikorako urgente eta beharrezkotzat jotzen badituzte neurri horiek, oinarritzko eskubideak mugatzea edo murriztea eragiten dutenean eta, betiere, neurrien hartzaileak banaka identifikaturik ez daudenean.

Osasunari buruzko azaroaren 23ko 10/1990 Foru Legearen 2.2 artikuluari jarraikiz,

AGINTZEN DUT:

Lehena.—Luzatzea 2021eko abuztuaren 26ra arte, egun hori barne, Osasuneko kontseilariaren ekainaren 29ko 22/2021 Foru Aginduaren lehen ataleko 40. puntuaren eta gerora egin zaizkion aldaketen indarraldia, baldintza berberetan. Foru agindu horren bidez, berariazko prebentzio neurri apartekoak hartu ziren Nafarroako Foru Komunitaterako, COVID-19ak eragindako egoera epidemiologikoak izandako bilakaeraren ondorioz.

Bigarrena.—Aldatzea Osasuneko kontseilariaren ekainaren 29ko 22/2021 Foru Aginduaren eranskinean agertzen den udalerrien zerrenda, Osasuneko kontseilariaren abuztuaren 10eko 29/2021 Foru Aginduaren bidez sartu zena. Udalerr horiek dira foru agindu honetan ezarritako irizpideak betetzen dituztenak, eta, beraz, gaueko zirkulazioa foru agindu honen 40. puntuan ezarri bezala murrizteko neurria udalerr horietan aplikatuko da.

Hirugarrena.—Foru agindu hau Lehendakartzako, Berdintasuneko, Funtzio Publikoko eta Barneko Departamentuko Aholkularitza Juridikora igortzea, Nafarroako Justizia Auzitegi Nagusiko Administrazioarekiko Auzien Salak foru aginduari baimen judiziala emateko behar den tramitazioa egin dezan; eta igortzea, halaber, Nafarroako Osasun Publikoaren eta Lan Osasunaren Institutuko kudeatzaileari, Lehendakartzako eta Gobernu Irekiko Zuzendaritza Nagusira, Gobernuak Nafarroan duen Ordezkaritzara, Barne Zuzendaritza Nagusira, Toki Administrazioaren eta Despopulazioaren Zuzendaritza Nagusira, Turismo, Merkataritza eta Kontsumo Zuzendaritza Nagusira, Enpresa Politikaren, Nazioarteko Proiektzioaren eta Lanaren Zuzendaritza Nagusira, Nafarroako Kirolaren Institutura, Nafarroako Udal eta Kontzejuen Federaziora, Osasun Zuzendaritza Nagusira eta Osasun Departamentuko Idazkaritza Tekniko Nagusira.

Laugarrena.—Foru agindu honek 2021eko abuztuaren 20ko 00:00etan hartuko du indarra.

Iruñean, 2021eko abuztuaren 17an.—Osasuneko kontseilaria, Santos Induráin Orduna.

ERANSKINA

**COVID-19AK ERAGINDAKO MUTURREKO
ARRISKU-EGOERAN DAUDEN UDALERRIEN ZERRENDA,
ABUZTUAREN 17AN EGUNERATUA**

Ver tabla completaVer tabla completa

UDALERRIA	14 EGUNEAN METATUTAKO INTZIDENTZIA	7 EGUNEAN METATUTAKO INTZIDENTZIA
Abaigar	3614,457	3614,457
Aberin	835,654	835,654
Ablitas	282,144	161,225
Altsasu	671,772	255,273
Andosilla	802,041	328,107
Arakil	535,905	214,362
Arantza	2345,058	1340,033
Arbizu	271,739	181,159
Areso	358,422	358,422
Arguedas	264,084	264,084
Azagra	1561,28	728,597
Bakaiku	828,729	552,486
Barañain	381,206	198,029
Barillas	1869,158	1401,869
Baztan	874,373	244,31
Bera	695,931	562,098
Berriobeiti	509,922	220,507
Berriozar	402,839	182,236
Betelu	2732,24	546,448
Burlata	377,042	214,704

Cascante	1475,155	439,958
Kaseda	513,347	205,338
Castejón	504,443	360,317
Cintruénigo	569,404	328,988
Ziritza	1290,322	1290,322
Deikaztelu	496,688	331,125
Ergoiena	268,817	268,817
Espartza Zaraitzu	1351,351	1351,351
Lizarra	716,871	202,751
Etxalar	1107,011	615,006
Etxarri Aranatz	563,834	443,012
Etxauri	461,538	307,692
Faltzes	302,375	259,179
Fitero	1889,607	745,897
Fontellas	401,606	200,803
Fustiñana	963,855	843,373
Garinoain	801,603	601,202
Goizueta	284,09	284,09
Uharte	492,888	267,567
Irurtzun	358,262	223,914
Ituren	391,389	195,694
Iturmendi	2233,25	992,555
Larraun	1261,829	841,219
Lekunberri	846,354	716,145
Lerin	1043,478	347,826

Lesaka	328,347	218,898
Ledeia	1369,863	684,931
Lodosa	415,282	207,641
Los Arcos	264,55	176,366
Martzilla	909,727	524,842
Mélida	682,128	409,276
Metauten	347,222	347,222
Miranda Arga	1787,842	595,947
Monteagudo	732,6	549,45
Murchante	481,463	337,024
Olaibar	793,65	264,55
Olazti	2149,093	335,795
Orkoien	394,38	197,19
Iruña	380,356	157,2
Gares	1091,549	704,225
Zare	2255,639	1503,759
Saldias	1639,344	819,672
San Adrián	1033,057	190,718
San Martin Unx	510,204	510,204
Sartaguda	380,228	152,091
Sesma	257,731	257,731
Sorlada	5263,157	5263,157
Sunbilla	444,444	148,148
Tebas-Muru Artederreta	660,066	330,033

Torres del Río	2380,952	2380,952
Tutera	788,791	319,929
Uharte Arakil	372,67	248,447
Ultzama	665,456	241,984
Urdazubi	286,532	286,532
Eguesibar	430,708	137,258
Valtierra	373,134	207,296
Viana	784,034	522,689
Atarrabia	254,802	127,401
Zizur Nagusia	436,417	221,565
Zugarramurdi	913,242	913,242
Zuñiga	3669,724	3669,724

Iragarkiaren kodea: F2112635